

**AKASHVANI AIZAWL**

**REGIONAL NEWS BULLETIN**

**HEADLINES ( EVENING )**

- 1.     Larsap General (Rtd) Vijay Kumar Singh-a’n Mizoram chu India rama TB natna awm lohna State hmasa bera siam thei tura theihtawp chhuahpuiah Mizo mipuite a sawm.
- 2.     Adviser to CM (Finance) Pu TBC Lalvenchhunga’n Mizoram chak lakluhna kawng chhia chu siam mekah harsatna lian tak a awm tawh lo an beisei tih a sawi.
- 3.     Lirthei a Eizawng Pawl Hrang Hrang ten Mizoram chak lakna kawngpui siam mek chuan an beisei a phak loh thu leh zankhat thil thua rah chhiat leh vek hlauhthawnawm an tih thu an sawi.
- 4.     Prime Mninister Narendra Modia chuan vawiin khan New Delhi-a Kartavya Bhavan-3 building Kartavya Path ami a hawng.

<><><>

**GOVERNOR**

Larsap General (Rtd) Vijay Kumar Singh-a’n Mizoram chu India rama TB natna awm lohna State hmasa bera siam thei tura theihtawp chhuahpuiah Mizo mipuite a sawm.

He thu hi vawiina Raj Bhavan-a Nikshay Mitra chawimawina leh TB natna veite hnena damdawi leh eitur tha semchhuahna, Pradhan Mantri TB Mukta Bharat Abhiyaan programme hmannaah a sawi a, Larsap chuan TB um bo turin he programme hi a pawimawh hle a ti a, khawvelin kum 2030 ah TB umbo hman a tum lain, India chuan khawvel aia kum 5 a hma, kumin 2025 ah umbo a tum a, kum chanve a pelh tawh avangin kumin chung ngeia TB nuai bo tumna beihpui thlak hautak tak hi a puitlin theih nan theihtawp tak meuh meuh chhuah tlan a tul a ti.

Larsap chuan Mizorama TB vei enkawl mek mi 1,501 zinga 117 te chauhin Food Basket Support kaltlanga eitur tha an dawng leh a tam zawkin an la dawng lo chu veiawm a tih thu sawiin, Food Basket hmalakna a thlawp zia lantir nan TB vei mi 10 te tana eitur tha pek a tum thu a puang a, he hmalakna hi thlawpa TB veite tana pen chhuak turin mipuite a sawm a ni.

Byte: Governor

Health Minister Pi Lalrinpuii pawhin he hunah hian thusawiin, Mizoram chhunga damdawi in hrang hrangte chu TB natna neite enkawl thei turin tih changtlun mek zel a ni a ti a, sorkar chuan TB damlote chu theihtawpin a enkawl a, a thlawnin damdawi man a pe vek a, thla tin eitur tha leina tur sang 1 a pe thin bawk tih sawiin, TB natna neite chu thuawiha tha taka damdawi ei thin turin a chah a ni.

Byte: Pi Lalrinpuii

He hunah hian Food Basket Support kaltlanga TB veite eitur tha pek kawnga thawh hlawk tak Nikshay Mitra pahnih - NEDFi leh Dr. Laxmi Narayan te hnenah Larsap-in chawimawina a hlan a. TB vei mi 4 te hnenah Food Basket hlan an nih bakah NEDFi in TB vei mi 100 te Food Basket Support kaltlanga an chhawmdawlna tur cheque chu TB veite aiawhin Larsap chuan a dawn sak nghal bawk.

He huna tarlan a nih danin, Mizoramah TB vei enkawl mi 1,501 awm mekin, chung zinga zaa 7.8 , mi 117 te chauhin Food Basket chhawmdawlna an dawng a. Nikshay Mitra 76 awm mekin TB vei zinga zaa 32.5 te chu taksa mamawh chaw tha dawng lo ni a chhut a ni.

<><><>

ADVISER TO CM

Advisor to CM (Finance) Pu TBC Lalvenchhunga’n Mizoram chak lakluhna kawng chhia chu siam mek a ni a, Lirthei Ke 14/16 tih loh chu lirthei tang an awm mumal lova, harsatna lian tak a awm tawh lo an beisei tih a sawi.

Akashvani Aizawl zawhna chhangin, MLA Pu TBC Lalvenchhunga chuan kawngchhe chungchangah ZPM chuan mawhphurhna la in, siamthat a nih theih nan theihtawp a chhuah mek a, kumdangah chuan hetiang hi a thlen tawh loh an beisei a ti a. Kawngchhiat chhan chu mawhphurhna inchuh vang a ni tih mipuiten an hre tlang vek tawh a ti.

Kawngchhia chu sorkar enkawl ni tawh lo mahse theihtawpin hma a la a, Chief Minister Pu Lalduhoma pawhin a siamthat theih nan sum a sanction a, PWD Minister hovin a department chuan a hmunah an riahchilh a, siam tha turin theihtawp an chhuah mek a ti a. Lirthei Ke 14/16 tih loh chu lirthei tang an awm mumal lova, harsatna lian tak a awm tawh lo an beisei tih a sawi.

Pu TBC a chuan lirtheia eizawngten sorkar an thawhpui tha a, kawng siam a nih theih nan lirthei tlan loh an remti chu lawmawm a tih thu a sawi a, lirthei tlan chawlh chhung hian kawng chu tha taka siam hman a nih a beisei tih a sawi.

Zawhna chhangin Pu TBC-a chuan thal lain kawng siam lo tawp an ni lo a, kumin January thla ah NHIDCL enkawl tura tih ni mah se kawng an siam nghal loh avangin Mizoram sorkar chuan theihtawpin a thawm tha a, tuna lirthei tanna lai ber Mega Foodpark phei chu an metal vek a, duhthu a sam lo deuh a, Fur a lo thlenin bungraw rit tak tak phur lirthei lo lut te chu kawng chuan a dawl zo lo a ni a ti a, tunah cheng vbc 50 in an sub-contract a engemawchen chu an siamthat theih tawh a beisei tih a sawi.

<><><>

COMMERCIAL VEHICLES

Lirthei a Eizawng Pawl Hrang Hrang te Joint Committee-in Vairengte leh Aizawl inkar kawngchhia thawm that hna thawh mek chu vawiin khan an endik a, an beisei a phak loh thu leh zankhat thil thuah rah chhiat leh vek hlauhthawnawm an tih thu an sawi.

Lirtheia Eizawng Pawl Chief Convener Pu Robert Lalrinawma chuan Akashvani Aizawl zawhna chhangin, Lirthei a Eizawng Pawl Hrang Hrang Joint Committee atangin Earth Movers Union, ZDU, MTOA, MTA, Mizoram Commercial Tippers Association, Fak Hlawh lo Valrual, 407 Association leh Tanker Association tiamin pawl hrang hrang an kal tih a sawi a, kawng siam mek chuan an beisei a pha lo a, hetihrual hian fur lai a nih avangin tih vak ngaihna a awm lo a ti a, tun dinhmunah sorkar in lirthei chhuah tir ta se, tuna kawng an siam ho pawh zankhat thil thuah an rap chhe leh vek ang tih a hlauhthawnawm a ti. A bikin Khamrang a Mega Food Park te chu dinhmun derthawng zual an ni a ti a, lirthei ke 14 chin chunglam tlan phal loh an nih avangin an ding rih vek a, heng ho hi an tlan chhuah tir chuan kawng siam mek chuan zankhat a daih an rin loh thu sawiin, beidawnthlak an tih thu a sawi a ni.

Byte: Pu Robert Lalrinawma

Pu Robert Lalrinawma chuan Mizoram sorkar thuchhuahah chuan August ni 7 thleng kawngpui siam a ni ang a, ni 8 leh ni 9-ah lirthei chhuah tir a tum a, hetihlai hian Lirtheia Eizawng Pawl te erawh chuan ni 9 thleng uluk takin siam se an duh a, sorkarin lirthei te a chhuah tir dawn a nih chuan heng kawng chhe zual te siamtha nghal zel turin lung bakah excavator, JCB leh hnathawktute duty turin dah reng thei se tlemin a ziaawm theih a rin thu a sawi.

"Lirthei Tlan Chawlh" an puan chu sorkar nek zawng leh mipui tihbuai nan ni lovin hnathawhna atana hun an pek a nih avangin sorkarin lirthei a tlan theih e a tih chuan an ding lui dawn lo tih a sawi a, hetihlai hian sorkarin kawng siam vengtu tur Police a dah chu lawmawm an tih thu sawiin, sorkar chuan kawng dinhmun veng chhunzawm zeltu tur dah se an duh thu a sawi bawk a ni.



KAMALANAGAR BY ELECTION

Chakma Autonomous District Council huam chhunga Kamalanagar ‘West’ By-Election chu vawiin khan boruak muanawm tak hnuaiah neih a ni.

Bialtu MDC Pu Sanjeev Chakma thihsan tak amalanagar ‘W’ MDC Constituency ah hian Polling Station 3 awmin, By-Election ah hian chuhtu Candidate 4 an awm a, ZPM Party candidate Pu Dinesh Moy Chakma, BJP Party Candidate Pu Joydeep Chakma, MNF Party Candidate Pu Rupyan Chakma leh INC Party Candidate Pi Kalpana Chakma te an ni.

Chawngte SDO (C) Pu Lalnunpuia Renthlei chuan Polling Station te hi tlawh kualin a vil reng a, Vawiin tlai dar thum thleng khan Polling Station pakhat Rajmandal chu inbiak pawhna lamah harsatna a awm avangin vote tlak dan dinhmun hriat a ni lova, Polling Station pahnih ah erawh vote awm zawng zawng atangin zaa 54.60 vote a tla tawh a ni. Rajmandal Polling Station ah hian vote 317 a awm bawk.

Kamalanagar West MDC Constituency a polling station pathum ah hian voter 1773 awmin mipa 883 leh hmeichhia 890 an awm mek a ni.

Vote thlak zawh a nih hnuah EVM te hi Lawngtlai pan pui nghal tura ruahman a ni a, ni 9 Inrinni khian vote chhiar a ni ang.

<><><>

## KHAWZAWL PINEAPPLE

Khawzawl District a Sialhawk khua chuan kawng chhiat avangin inremna an siampui Guwahati a Aromatic Company-ah lakhuihthei an hralh tam thei lova, an khaw chhehvelah a tharchhuah tam zawk an tiral.

Kan corr report lo ngaithla ang.

VC

*Sialhawk khua hian kumin hian Lakhuihthei Quintal 2500 an hralh chhuak tawh ni a thudawn a ni a, tunlai hian Lakhuihthei hralh chhuak mek zelin vawiin thleng khan Quintal 2500 an hralh tawh a. Guwahati Aromatic Company nen inremna lo siam tawh mahse kawng chhia avangin June thla tawp lama Quintal 400 an hralh bak an thawn belh thei lova. Kumina Quintal 2500 an thar chhuah tawhah Quintal 2100 vel chu khaw chhehvelah te zuar kualin an hralh a, Lakhuihthei hi tunah hian Kg. 1 Rs. 10/- in an hralh a ni.*

*Sialhawkah hian Lakhuihthei ching hi chhungkaw 240 vel an ni a, nikum khan Quintal 1400 vel an hralh chhuak a ni.*

<><><>

## AIR NEWS

Chanchintha hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchintha hi ngaihthlak leh chhiar theih a dah a ni.

Naktuk zing dar 7 leh a chanve ah Chanchintha puan leh a ni ang.

<><><>

## KARTAVYA BUILDING

Prime Mninister Narendra Modia chuan vawiin khan New Delhi-a Kartavya Bhavan-3 building Kartavya Path ami a hawng. PM Modia hian building thar hi a fang kual nghal a. He hunah hian Union Minister of Housing and Urban Affairs Manohar Lal pawh a tel a ni.

Kartavya Bhavan-3 hi Central Vista tihlenna pakhat a ni a. Central Secretariat building sak zingah hawn theiha peih hmasak ber a ni a. Tunlai changkanna milin Kartavya Bhavan hi sak a ni a. Sawrkar hna leh lehkha pawimawhte rang zawka bawhzui anih theih nan ministry pawimawh zualte he building ah hian dah khawm an ni dawn a. Union Ministry hrang hrang Home, External Affairs, Rural Development, MSME, DoPT, Petroleuam and Natural Gas, leh Principal Scientific Adviser te an insuanltu dawn a ni.

<><><>

**PARLIAMENT**

Parliament chuan Carriage of Goods by Sea Bill,2025 vawiin khan a pass. Lok Sabha-ah pass anih hnuin vawiin khan Rajya Sabha ah pass a ni veleh a. He dan thar hian dan awmsa Indian Carriage of Goods by Sea Act,1925 a thlak dawn a. He bill hian lawngchawlhna hmun atanga tuifinriata bungrua an phurh kualna kawngah mawhphurhna, chanvo leh dan hnuai a an chet dan tur hrang hrang a siam thar a. Kum 100 dan lo hman tawh arawn thlak dawn a ni.

<><><>

**UTTARKHAND**

Uttarakhand-a ruah bawhawk avanga Dharali khua chhiatna thlengah chhanchhuah hna ngawrh taka thawh mek a ni.Vawiin khan Uttarakhand Chief Minister Pushkar Singh Dhami chuan thlawhna atangin vanduaia thlenna hmun hi a en kual a. Hemi hnu hian sawrkar thuneitute nen uluk takin chhiatna thlen dan leh chhawmdawl na kalpui chhoh dan an thlirho leh a ni.

Prime Minister Narendra Modia pawhin Uttarakhand Chief Minister hi phone hmanga biain an dinhmun kimchang a zawt a . Sawrkar laipui atangin tanpuina awmte pek vek a tiam nghal a ni.

Puan tawh angina Uttarakhand-a Uttarkashi district chhung Dharali khuaah hian ruah baw hawk avanga Kheer Ganga lui tui lianin chhiatna nasa tak thlenin mi pali an thi a, mi dang engemawzat chin hriat lohin an awm. District Emergency Operation Centre atanga thudawn danin tuilian thut hian bazar hmunte, chenna in, hotel leh dawr tam tak a ti chhia a. Hriat theih chinah mi pali an thi a, midang engemawzat chin hriat lohin an bo niin District Magistrate Prashant Arya chuan a sawi.

Chhanchhuah hna ngawrh taka thawh nghal a ni a. Sipai, SDRF, NDRF, district thuneitute leh a kaihhnawih thuneituten ngawrh takin chhanchhuah hna an thawk a ni. State Disaster Management Secretary Vinod Kumar chuan sawrkar lamin an inralring reng tih sawiin chhiatna tawkte chhawmdawl turin theihtawp an chhuah tih Akashvani a hrilh a ni.

<><><>